

2

<<ՍԵՅՍՄԻԿ ՊԱՇՏՊԱՆՈՒԹՅՈՒՆ >> ԾՐԱԳՐԻ (ԲՅՈՒՋԵՏԱՅԻՆ ԴԱՍԱԿԱՐԳՄԱՆ  
ԲԱԺԻՆ- 01, ԽՈՒՄԲ -06, ԴԱՍ-01)

ԻՐԱԿԱՆԱՑՄԱՆ ՀԱՄԱՐ ՊԵՏՈՒԹՅԱՆ ԿՈՂՄԻՑ ԴՐԱՄԱՇՆՈՐՀԻ ՁԵՎՈՎ  
ՏՐԱՄԱԴՐՎՈՂ ՖԻՆԱՆՍԱԿԱՆ ԱԶԱԿՑՈՒԹՅԱՆ ԳՈՒՄԱՐՆԵՐԻ ՕԳՏԱԳՈՐԾՄԱՆ ՄԱՍԻՆ

ք.Երևան

«24» հունիսի 2025 թ.

ՀՀ Ներքին գործերի նախարարությունը (այսուհետ՝ Նախարարություն), ի դեմս գլխավոր քարտուղար Ա. Ֆիդանյանի, որը գործում է Նախարարության կանոնադրության հիման վրա (այսուհետ՝ Նախարարություն), մի կողմից և «Սեյսմիկ պաշտպանության տարածքային ծառայություն» պետական ոչ առևտրային կազմակերպությունը (այսուհետ՝ Կազմակերպություն), ի դեմս տնօրենի Ժ/պ Ս.Մարգարյանի, որը գործում է Կազմակերպության կանոնադրության հիման վրա, մյուս կողմից, համաձայն «Հայաստանի Հանրապետության 2025 թվականի պետական բյուջեի մասին» ՀՀ օրենքի և ՀՀ կառավարության 2024 թվականի դեկտեմբերի 27-ի N2060-Ն որոշման, կնքեցին սույն պայմանագիրը (այսուհետ՝ Պայմանագիր) հետևյալի մասին.

**1. Պայմանագրի առարկան**

1.1 Պայմանագրով Կազմակերպությունը պարտավորվում է «Սեյսմիկ պաշտպանություն» ծրագրի իրականացման աշխատանքները (այսուհետ՝ Աշխատանքներ) կատարել սույն պայմանագրով նախատեսված կարգով և ժամկետներում, իսկ Նախարարությունը պարտավորվում է Աշխատանքների իրականացման համար Կազմակերպությանը տրամադրել «Հայաստանի Հանրապետության 2025 թվականի պետական բյուջեի մասին» ՀՀ օրենքով նախատեսված պետության կողմից դրամաշնորհի հատկացման ձևով ֆինանսական աջակցություն:

1.2 Կազմակերպությունը պարտավոր է Աշխատանքներն իրականացնելիս ստացված և գաղտնի ճանաչված տեղեկություններն օգտագործել «Պետական և ծառայողական գաղտնիքի մասին» ՀՀ օրենքով սահմանված կարգով:

1.3 Աշխատանքներն իրականացվում է Պայմանագրի անբաժանելի մաս հանդիսացող Հավելված N1-ին և Հավելված N2-ին համապատասխան:

## 2. Կողմերի իրավունքներն ու պարտավորությունները

### 2.1. Նախարարությունն իրավունք ունի՝

- 2.1.1. Օգտագործել Աշխատանքների արդյունքները,
- 2.1.2. Կազմակերպությունից պահանջել ներկայացնել ՀՀ օրենսդրությամբ և այլ իրավական ակտերով նախատեսված ձևով ու կարգով ամսական, եռամսյակային և տարեկան հաշվետվություններ հավելված N1-ում նշված բովանդակության համապատասխան,
- 2.1.3. Կազմակերպությունից պարբերաբար պահանջել և ստանալ տեղեկատվություն սույն Պայմանագրի կատարման ընթացքի մասին,
- 2.1.4. Իր իրավասությունների սահմաններում կասեցնել Կազմակերպության կողմից ոչ պատշաճ ձևով կամ կարգով կատարվող աշխատանքները,
- 2.1.5. Վերահսկել Կազմակերպությանն հատկացված դրամական միջոցների նպատակային օգտագործումը,
- 2.1.6. Կազմակերպությունից պահանջել Աշխատանքները կատարել սույն պայմանագրի 4-րդ կետում նշված ժամկետում:

### 2.2. Նախարարությունը պարտավոր է՝

2.2.1. Իր և Կազմակերպության կանոնադրություններով սահմանված կարգով, ձևով ու չափերով Կազմակերպությանը ցուցաբերել մեթոդական և կազմակերպչական օգնություն:

### 2.3 Կազմակերպությունը պարտավոր է՝

2.3.1. Պայմանագրի շրջանակներում ստացված ֆինանսական աջակցությունն օգտագործել միայն Աշխատանքների իրականացման համար,

2.3.2. Նախարարության հետ համաձայնեցնել երրորդ անձանց պատկանող մտավոր գործունեության պահպանվող արդյունքների օգտագործման, դրանց օգտագործման համար իրավունքների ձեռք բերման անհրաժեշտությունը.

2.3.3. Իր ուժերով և իր հաշվին վերացնել Աշխատանքների կատարման ընթացքում իր մեղքով թույլ տված այն թերությունները, որոնք կարող են հանգեցնել ծրագրով նախատեսված միջոցառումներից շեղումների:

2.3.4. Նախարարությանն անհապաղ տեղեկացնել Աշխատանքների սպասվելիք արդյունքի ստացման անհնարինության հայտնաբերման կամ Աշխատանքները շարունակելու աննպատակահարմարության մասին:

2.3.5. Նախարարությանը հանձնել Աշխատանքների արդյունքները՝ չխախտելով այլ անձանց իրավունքները:

2.3.6. ՀՀ օրենսդրությամբ և այլ իրավական ակտերով նախատեսված ձևով ու կարգով Նախարարություն ներկայացնել ամսական, եռամսյակային և տարեկան հաշվետվություններ և տեղեկատվություն Պայմանագրի կատարման ընթացքի մասին:

### **3. Ֆինանսական աջակցության չափը և կարգը**

3.1. Կազմակերպության աշխատանքների իրականացման ֆինանսական աջակցությունն ըստ Պայմանագրին կից նախահաշվի կազմում է ընդամենը 648805800 (վեց հարյուր քառասունութ միլիոն ութ հարյուր հինգ հազար ութ հարյուր ) ՀՀ դրամ, այդ թվում ըստ «Հայաստանի Հանրապետության 2025 թվականի պետական բյուջեի մասին» ՀՀ օրենքի՝ 648805800 (վեց հարյուր քառասունութ միլիոն ութ հարյուր հինգ հազար ութ հարյուր ) ՀՀ դրամ և 01.01.2025 թ. դրամական միջոցների ազատ մնացորդի հաշվին՝ 0 ( զրո) դրամ: Կազմակերպության ձեռնարկատիրական գործունեությունից 01.01.2025 թ. դրամական միջոցների ազատ մնացորդը կազմում է 13371143.6 (տասներեք միլիոն երեք հարյուր յոթանասունմեկ հազար մեկ հարյուր քառասուներեք դրամ վաթսուն լումա) ՀՀ դրամ:

3.2. Կազմակերպության կողմից Աշխատանքներն իրականացվում են հաշվետու տարվա ընթացքում, իսկ վճարումներն իրականացվում են ամսական՝ կանխավճարային ձևով, յուրաքանչյուր ամսվա առաջին տասն աշխատանքային օրվա ընթացքում, բացառությամբ 2025 թվական հունվար ամսվա հատկացվելիք գումարի, որը տրամադրվում է մինչև 2025 թ. փետրվարի 15-ն ընկած ժամանակահատվածում:

3.3. ՊՈԱԿ-ի թափուր հաստիքների լրացման պարագայում ծախսերի նախահաշվով նախատեսված աշխատավարձի ֆոնդի պակասորդը կլրացվի ՊՈԱԿ-ի ձեռնարկատիրական գործունեությունից ստացված եկամուտներից:

3.4. 2025 թվականի պետական բյուջեից առանց մրցույթի դրամաշնորհի ձևով իրավաբանական անձանց տրամադրվող հատկացումների շրջանակում կնքված՝ սույն դրամաշնորհի պայմանագրով նախատեսված միջոցառումների տարեկան արդյունքները Նախարարության կողմից ընդունվելուց հետո, Կազմակերպությունը միջոցառումների իրականացման արդյունքում առաջացած տնտեսումները ( խնայողությունները) վերադարձնում է Հայաստանի Հանրապետության պետական բյուջե՝ ոչ ուշ, քան մինչև 2025 թվականի դեկտեմբերի 20-ը:

3.5. Ավելացված արժեքի հարկի վճարման համար նախատեսված հատկացումների գծով չօգտագործված գումարները մինչև 2025 թվականի դեկտեմբերի 20-ը ենթակա են վերադարձման Հայաստանի Հանրապետության պետական բյուջե: Կազմակերպությունը մինչև 2025 թվականի դեկտեմբերի 20-ը Նախարարությանն է ներկայացնում տեղեկատվություն Պայմանագրի շրջանակներում հաշվարկված և պետական բյուջե վճարված ԱԱՀ գումարների, ինչպես նաև Օրենքի 7-րդ հոդվածի 22-րդ մաս պահանջներին համապատասխան չօգտագործված և ՀՀ պետական բյուջե վերադարձված գումարների վերաբերյալ:

#### **4. Պայմանագրի գործողության ժամկետը**

4.1. Պայմանագիրն ուժի մեջ է մտնում ստորագրման պահից, տարածվում է 2025 թ. հունվարի 1-ից հետո ծագած հարաբերությունների վրա, գործում է մինչև 2025 թ. դեկտեմբերի 31-ը:

#### **5. Աշխատանքների հանձնման և ընդունման կարգը**

5.1. Նախահաշվով նախատեսված աշխատանքների իրականացման ընթացիկ և վերջնական արդյունքները Կազմակերպության կողմից հանձնվում և Նախարարության կողմից ընդունվում են Կոլեգիալ կառավարման մարմնի դրական եզրակացության հիման վրա:

#### **6. Կողմերի պատասխանատվությունը**

6.1. Կողմերը Պայմանագրով նախատեսված պարտավորությունները չկատարելու կամ անպատշաճ կատարելու դեպքում կրում են պատասխանատվություն ՀՀ օրենսդրությամբ սահմանված կարգով:

#### **7. Վեճերի լուծման կարգը**

7.1. Պայմանագրի կապակցությամբ ծագած վեճերը լուծվում են բանակցությունների միջոցով: Համաձայնություն ձեռք չբերելու դեպքում վեճերի լուծումը կատարվում է Հայաստանի Հանրապետության օրենսդրությամբ սահմանված կարգով:

## 8. Այլ պայմաններ

8.1. Կազմակերպությունն իրավունք չունի առանց Նախարարության գրավոր համաձայնության այլ կազմակերպություններին, հիմնարկներին և երրորդ անձանց հանձնել Պայմանագրի շրջանակներում կատարված Աշխատանքների արդյունքները:

8.2. Աշխատանքների կատարմանը երրորդ անձինք կարող են ներգրավվել միայն Նախարարության համաձայնությամբ:

8.3. Պայմանագրի պայմանների փոփոխումը, լրացումը կամ գործողության դադարեցումը իրականացվում է կողմերի գրավոր համաձայնությամբ:

8.4. Պայմանագիրը կնքված է հայերեն լեզվով, 2 (երկու) օրինակից, որոնք ունեն հավասարազոր իրավաբանական ուժ: Յուրաքանչյուր կողմին տրվում է մեկական օրինակ:

ՀՀ ներքին գործերի նախարարություն  
Հասցեն՝ ք.Երևան, Նալբանդյան փողոց  
130

Հ/հ 900011055275

ՀՀ ֆինանսների նախարարության  
գործառնական վարչություն  
ՀՎՀՀ 02882913

ՀՀ ներքին գործերի  
Նախարարության գլխավոր քարտուղար

Ա.Ֆիդանյան

«Սեյսմիկ պաշտպանության  
տարածքային ծառայություն» ՊՈԱԿ  
Հասցեն՝ ք.Երևան, Ծիծեռնակաբերդի  
խճուղի 8/1

Հ/Հ 900018003443

ՀՀ ֆինանսների նախարարության  
գործառնական վարչություն  
ՀՎՀՀ 01224751

Տնօրենի ժ/պ

Ս.Մարգարյան